

# Sò natu corsu

O quant'abbracci di ghjennaghju Chì principia una nova annata,  
Ma a Corsica face un paghju Ch'ella ùn hè tanta scambiata.

Passanu ghjorni é settimane A pienghje lu tempu chi fù, Ma per  
custrui un dumane, E croce ci sò tant'è più.

Di ferraghju hé grisgiu lu celu, E quandu lu ventu si leva  
N'ùn ci porta mancu un battellu, Ci serà torna un'antra greva  
!

E quand'ella vene a tempesta, A neve si mette à cascà, In li  
paesi nimu ùn resta, Manca l'elettricità.

In l'ottanta dui, di marzu, Una vulintà pupulare Hè fattu un  
sonniu cusì falzu D'un stattutu particolare ; More 'ssa  
sperenza putenta, Di dritta, di manca o d'altrò, Ma quale hè  
chì ci ripresenta ? Venduti, ladri è baullò...

Sò natu Corsu è vai puru Qualchì volta mi sentu solu.

U rè d'i coni, sò sicuru Ch'ellu ùn hè Tedescu o Spagnolu.

Ti sì scurdatu di 'ss' aprile Chì parturì un certu Pasquale, E  
d'issa rivolta civile Chì li fece generale ; Fola a so vita hè  
diventata, Ma si spenghje la so memoria, Chì di Paoli a casata  
Assenta hè d'i libri di storia.

Di maghju, in lu sessanta nove, Un ti scurdà di u macellu D'a  
battaglia di Ponte Novu E di lu so soffiu ribellu.

U fiatu d'issi rivultati Dimmi ciò ch'ellu duvintò, Fatalisti  
simu firmati Techji di televisiò.

Di ghjungnu quale si ramenta Quest'ora di tamantu dolu,  
Quand'u mio core si spaventa Per l'impiccati di Niolu ?

Di quest'ondici marturiati Svaniti in la nostra amnesia, Micca statue ne ritratti Per u corciu Marcu Maria.

Sò natu Corsu, ma amicu Guardendu 'sse sperenze spese, U rè d'i coni, a ti dicu Un hè Talianu ne Inglese.

Di lugliu ballemu in unione, Di festa femu tutti mostra, Per una revoluzione Ch'ùn hè mai stata la nostra.

Ma di Sambucciu è Sampieru Ricordu, n'ùn ci n'hè manc'unu, Oghje quale festighja, fieru, A nostra a Terra di u Communu ?

D'Aostu, un nome : Aleria Hè incesu l'attualità D'una cuscenza ritta è fiera, Corsa è viva, un'identità. Ma sò passati quarant'anni E più nimu per celebrà, Techji di putere è d'inganni, L'omi sò pronti à smenticà.

Di Settembre, in quaranta trè Qui hè statu vintu lu Male. Splenderà sempre in cor'di mè U nostru Fronte Naziunale. Ma a memoria n'ùn fa prova, Chi sarianu belli tristi Li Scamaroni è Casanova Di vedeci vutà fascisti.

Sò natu Corsu è la mio via Hè colma di dolu è d'anno ; I rè d'i coni, ùn hè bugia, Ié, vi la dicu, simu noi !

D'ottobre finisce a staggione, Si sò biote tutte le vie, Ferma disertu lu rughjone, E si chjodenu l'osterie.

Ripiglia la vita « nurmale » Chi trè volte u prezzi hè pagata, Cuntinuità territoriale In chè stacche ti sì piattata ?

Nuvembre splendì una spera : Fù vutata a custituzione Ch'ispirò a pianetta intera, Quella di a Corsica Nazione. Oghje si parla indipendenza, U solu ventu chi ci porta Hè quellu di l'intulerenza, A miseria pichja à a porta.

Era dicembre, in Bucugnà, Qui sparì un omu tamantu, Ellu c'amparò à luttà Cù a sola forza di u cantu. Era di ghjustizia

u to fiatu, Di tulerenza è di curraghju, Ma oghje, chi n'avemu  
fattu O Natale, d'u to missaghju ?

Sò natu Corsu è eiu ùn temu L'avvene è ciò chì ci vole à fanne  
; Ma o fratelli, ch'aspettemu Per alzà un altro dumane ?